

Lo Ilahiéi di Rutoou

Langue francoprovençale, variante de Morgex

Séide-vo que ieuì ouì ll'è lo Ilahiéi di Rutoou on coou
ll'ie an groousa montagnetta ieuì d'etsatèn alaon on
tsan de tchot de vatse é de coloché de fèye?

I pià de an groousa rotse, dedeun on groou beui, le berdjéi
traaillaon lo lahéi é fiaon lo fromadzo. Lo propriétéo l'ie gn'ommo
grammo è acrapì que trattaé malle quieutte.

On dzoo l'è areoou canque su léi on poo malereu, mal arbeillà é agrouloou, que demandae i padrón gn'ecouéila de lahéi pe enmeilléi son bocón de pan deuo.

L'ommo que l'ayè on man on sedzeleun bièn plen, lo tsahie ià malamente on lèi dièn:

- Pistoou que te bailléi si lahéi lo fotto pe l'erba, é on dièn pai, vouigue pe tèra to lo sedzeleun.

Tan de mechansetoou féi reustéi malle lo poo ommo. Maque lo tseun, pe lèi demouhéi an mia d'affechón, va lèi lapéi le man. Llu lo caesse; apréi, on moouhèn lo gran praa, di:

- Deun poca ten to so saè to blan.

Deconfortoou lo poo s'en va lo lon de la montagne. Méi
aprèi corque paa se veurie é féi remarquéi:
- Aiquiooude bièn, aruon dza de gnolle nèye.
De grouse gnolle méahiaon on temporale é lo sielle
coménhiaie a vin-ì sombro.

Quieutte, ommo é béihie, sentaon que corquetsoouza
de tériblo se aprestae. Le-z-irondelle pouhiaon leuo
piquioou foua di ni, se bettaon on fila é vollaon ver lo
fon de la valloou.

Le marmotte se aréihaon. Avouì de chublo prolongjà
diàon i béhiòn de galopéi pe aléi se catchéi deun lo
boouque.

Toodzèn le leui sortaon é on apréi l'outro se onréyaon
pe le sentéi de la créiha ; traèsaon lo colle pe areéi deun
lo bouque de l'outro cotéi de la montagne.

Le-z-aille volaon oncò pi on l'èa, bièn dussù le gnolle pe
recondre ooutre de léi le becque.

On men de ren, oncò se l'ie on plen etsâtèn, comenhie
a nèivre é conquiàn a betéi ba de nèi dzoo é natte, pe
de dzornéi onquie...

To lo mayèn iàn topoou avouè an groousa bliha de nèi...
que l'a jaméi pi fondù !
Vouelà comàn lè néichù lo llahiéi di Rutoou que
quieutte no pouchèn vère oncò voui.

Qui saè-teu ihoou séi poo ommo ?